


Ni Presidente
Dieter F. Uchtdorf

Maikadua a Mammagbaga
iti Umuna a Pangulu



Agbiagto dagiti Nalinteg babaen ti Pammati

Ti Rabbi ken ti Agar-aramid iti Sabon

Adda maysa a daan nga Estoria maipapan ti agar-aramid iti sabon a saan a mamati iti Dios. Maysa nga aldaw bayat ti pannagnana a kaduana ti maysa a rabbi, kinunana, “Adda diak maawatan. Adda relihiontayo iti uneg ti rinibu a tawen. Ngem iti amin a lugar adda dakes, panagbasol, kinaulbod, kinaawan hustisia, saem, panagbisin, ken kinarangas. Makita a ti relihion ket saan a talaga nangpaduras iti lubong. Isu a saludsodek kenka, ania ti nasayaat iti daytoy?”

Saan a simmungbat a dagus ti rabbi ngem intuloyna ti pannakipannagna iti agar-aramid iti sabon. Idi agangay nadanonda ti maysa playground, a pagay-ayaman dagiti nadungriten nga ubbing.

“Adda banag a diak maawatan,” kinuna ti rabbi “Kitaem dagita nga ubbing. Adda sabontayo iti uneg ti rinibribu a tawen, ngem narugit dagita nga ubbing. Ania ti nasayaat nga ited ti sabon?”

Insungbat ti agar-aramid iti sabon, “Ngem rabbi, saan a nainkalintegan nga ipabasol iti sabon dagitoy nadungrit nga ubbing. Nasken a mausar ti sabon sakbay a maipangtungpalna ti panggepna.”

Immisem ti rabbi ket kinunana, “Agpayso.”

Kasano nga Agbiagtayonto?

Ni Apostol Pablo, iti panangadawna iti sao ti maysa a propeta iti Daan a Tulag, ket ginupugopna no ania ti kayat a sawen ti agbalin a mamatpati idi isuratna ti “Agbiagto ti nalinteg gapu iti pammati” (Taga Roma 1:17).

Nalabit iti daytoy a simple a binatog maawatantayo ti pagdumaan ti relihion a nakapuy ken saan a makaaring ken ti maysa nga addaan bileg a mangbalbaliw kadagiti biag.

Ngem tapno maawatan no ania ti kayat a sawen ti agbiag babaen ti pammati, nasken a maawatantayo no ania ti pammati.

Ti pammati ket ad-adda pay nga amang ngem iti panamati. Daytoy ti naan-anay a panagtalek iti Dios a buyogan ti panagaramid.

Ad-adda pay daytoy ngem iti panagtarigagay.

Ad-adda pay daytoy ngem iti panagtugaw, panagtunged, ken panangisao nga umanamongtayo. No kunatayo a “ti nalinteg *agbiagto gapu iti pammati*,” kayattayo a sawen a matarabay ken maiturongtayo gapu iti pammatitayo. *Agtignaytayo* iti wagas a maitunos iti pammatitayo—saan a gapu iti panagtungpal laeng a saan a pampanunoten ngem gapu iti panagtalek ken napudno nga ayat para iti Dios ken para iti di magatadan a pagsiriban nga impalgakna kadagiti annakna.

Ti pammati nasken a mabuyogan iti panagaramid; no saan awanan daytoy iti biag (kitaen iti Santiago 2:17). Saan a pudno a pammati daytoy. Awanan daytoy iti bileg a mangbalbaliw iti maysa a tao, bay-an nga agmaymaysa iti lubong.

Agtalek dagiti lallaki ken babbai iti naasi a Nailangitan nga Amada—uray kadagiti panawen ti kinaawan namnama, uray kadagiti panawen ti panagduadua ken panagrigat no saanda a naan-anay a makakita wenno dida maawatan.

Sipapasnek a magna iti dalan ti kinadisipulo dagiti lallaki ken babbai nga addaan pammati ken ikarigatanda ti sumurot iti pagwadan ti ay-ayatenda a Mangisalakana, ni Jesucristo. Ti pammati ket mangguyugoy, ken mangparegta kadatayo a mangiruknoy dagiti pusotayo iti langit ken sireregta a mangdanun, mangparegta, ken mangbendision kadagiti padatayo a tattao.

Ti relihion nga awan ti aramid ket kasla sabon nga agtalinaed iti kahon. Mabalina nga addaan daytoy iti nakaskasdaaw a potensial, ngem iti kinapudnona bassit ti bilegna a mangbalbaliw iti biag agingga a dina maipatungpal ti naisangrat a panggepna. Ti ebanghelio ni Jesucristo ket ebanghelio nga addaan iti aramid. Ti Simbaan ni Jesucristo ket mangisursuro iti pudno a relihion kas maysa a mensahe ti namnama, pammati, ken panangngaasi, agraman ti panangtulong iti dadduma iti naespirituan ken temporal a wagwagas.

Sumagmamano a bulan ti napalabas, nagbiahekami iti asawak a ni Harriet a kaduami ti sumagmamano nga annakmi iti lugar ti Mediterranea. Binisitami ti sumagmamano a refugee camp ken nakipagkita kadagiti pamilia a naggapu kadagiti pagilian a rinebba ti gubat. Saantayo a kapada ti pammati dagitoy a tattao, ngem kakabsattayo ida ken kaspulanda ti madagdagus a tulong. Nasagid unay ti puspusomi idi maimatanganmi no kasano a ti naregta a pammati dagiti miembro ti Simbaantayo ken nangisangbay iti tulong, gin-awa ken namnama iti padatayo a tattao nga agkasapulan, ania man ti relihion, nasionalidad, wenno adalda.

Ti pammati a nabuyogan iti agtultuloy nga aramid ket mangpunno iti puso iti kinaasi, ti panunot iti sirib ken pannakaawat, ken ti kararua iti talna ken ayat.

Ti pammatitayo ket mangbendision ken sililinteg a mangimpluensia kadatayo ken kadagiti adda iti aglawlawtayo.

Ti pammatitayo ket mangpunno iti lubong iti kinaimbag ken kinatalna.

Ti pammatitayo ket mamagbalin iti gura iti ayat ken dagiti kabusortayo iti gayyem.

Kalpasanna, dagiti nalinteg a tao, nga agbiag babaen ti panagtignay a sipapammati; agbiagda babaen ti panagtalek iti Dios ken pannagna iti dalanna.

Ket dayta ti kita ti pammati a makapagbalbaliw iti tunggal tao, pamilia, nasion, ken ti lubong.

PANANGISURO MANIPUD ITI DAYTOY A MENSAHE

Ilawlawag ni Presidente Uchtdorf a ti pammati ket ad-adda pay ngem iti panangipeksa laeng iti panamati. Agkasapulan iti aramid ti pudno a pammati iti Nailangitan nga Ama ken ni Jesucristo, ken ti panagbiag babaen ti pammati ket addaan iti bileg a mangbalbaliw kadagiti biag ken pagtaengan. Mabalinyo nga awisen dagiti sursuruanyo a mangibinglay kadagiti kanito no nakitadan dagiti bendision ken bileg ti panagbiag babaen ti pammati—manipud kadagiti personal a padas wenno panagpaliw dagiti dadduma. Allukoyenyo ida nga agkararag para iti pannarabay a mangammo no kasano nga agbiag iti nasaysayaat iti ebanghelio.

AGTUTUBO

Panagserbi kadagiti Dadduma iti Pammati

Ibaga kadatayo ni Presidente Uchtdorf a ti pammatitayo iti Dios *nasken* a “mabuyogan iti aramid.” No ti pammatitayo ket “mabuyogan iti agtultuloy nga aramid,” ilawlawagna, daytoy ti “mangpunno . . . iti kararua iti talna ken ayat.” Ti kaadda ti kari daytoy a bendision, *kabaelantayo* ti agaramid iti pagdumaan, ket makitatayo daytoy iti biagtayo no ikkantayo ti panawen ti panagaramid iti serbisio a napuan iti pammati. Makapagkararagkayo iti tunggal bigat tapno agkiddaw iti Apo iti tulong iti panagserbi iti dadduma. Kas pagarigan, idawatyo Kenkuana nga ipakitana kadakayo no kaano nga agkasapulan ti maysa a kabsat iti tulong iti trabaho iti balay wenno no agkasapulan ti maysa a gayyem iti pammadayaw. Kalpasanna, no maawatyo ti parikna, agtignay iti daytoy! No ugaliengyo dagiti kastoy a panagkararag ken daytoy a serbisio, ditan a ti napammatian, agtultuloy a tignayyo ket mangbendisionto iti biagyo ken iti biag dagiti dadduma. Ikari ni Presidente Uchtdorf a “kabaelanyo ti mangbalbaliw iti tunggal tao, pamilia, nasion, ken ti lubong.”

ANNAK

Talek

Padasenyo daytoy nga aktibidad iti maysa a gayyem. Nasken nga agtalek ken surotenyo a nasayaat dagiti annuroten.

Mangala iti maysa nga awan suratna a papel ken mangidrowing ditoy ti nagtimbukel a sinanrupa. Siiiggemkayo iti bolpen wenno lapis, agkidemkayo. Paibagayo iti gayyemyo kadakayo no sadino ti pangidrowingan kadagiti mata, agong, ngiwat, ken buok iti daytoy a sinanrupa. Kalpasanna agmulagat ket kitaenyo. Ania ti nagbalinanna? Mabalinyo a koloran ti sinanrupa ket agdrowing manen iti sabali tapno uliten manen ti ay-ayam.

No dadduma narigat ti mangsuot kadagiti direksion. Ngem no padasentayo a suroten ti Nailangitan nga Ama babaen ti panangdengngeg iti Espiritu Santo, tulongannatayto. Kanayon a makapagtalektayo Kenkuana.

© 2017 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/16. Pannakaanamongna a maipatarus: 6/16. Pannakaipatarus ti *First Presidency Message, April 2017*. Ilokano. 97924 864



Sapata ken Katulagan ti Priesthood

Pammati, Pamilia, Tulong

Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawattayo iti panggep ti Relief Society ket mangisagananto kadagiti annak a babbai ti Dios para kadagiti bendision ti agnanayon a biag?

Ti ad-adda a pannakaawattayo kas agkakabsat a babbai a ti sapata ken katulagan ti priesthood ket personal a mayaplikar kadayto, ad-adda met a maawattayo dagiti bendision ken kari ti priesthood.

Kinuna ni Elder M. Russell Ballard ti Korum dagiti Sangapulo-ket-dua nga Apostol, “Amin a nagaramid kadagiti sagrado a katulagan iti Apo ken mangdayaw kadagita a katulagan ket maikari nga umawat iti personal a paltiing, tapno mabendisionan iti panagserserbi dagiti anghel, tapno makisarita iti Dios, tapno umawat ti pakabuklan ti ebanghelio, ken, kangrunaanna, tapno agbalin nga agtawid kas ken ni Jesucristo iti amin nga adda iti Amatayo.”¹

Dagiti bendision ken kari ti sapata ken katulagan ti priesthood ket maipanggep iti agpada a lalaki ken babbai. Kinuna ni Sister Sheri L. Dew, sigud a mamagbaga iti Sapasap a Panguluen ti Relief Society, “Ti pakabuklan ti priesthood a naglaon kadagiti

kangatuan nga ordinansa ti balay ti Apo ket maawat laeng ti lalaki ken babbai a sangkamaysa.”²

Inted ni Sister Linda K. Burton, Sapasap a Presidente ti Relief Society daytoy nga awag, “Awisendakayo a mangyulo iti sapata ken katulagan ti priesthood, a masarakan iti Doktrina ken Katulagan 84:33–44. Babaen ti panangaramid iti daytoy, ikarik kadakayo a padakkelento ti Espiritu Santo ti pannakaawattayo iti priesthood ken paregtaen ken itag-aynakayo iti nakaskasdaaw a wagwagas.”³

Dagiti panangiturong ni Joseph Smith iti Relief Society ket naisangrat a mangisagana kadagiti babbai nga “umay nga agtagikua kadagiti pribilehio ken bendision ken sagut ti priesthood.” Maipatungpalto daytoy babaen dagiti ordinansa ti templo.

“Dagiti ordinansa iti templo [ket] dagiti ordinansa ti priesthood, ngem saanda a mangted iti saad nga ecclesiastical kadagiti lalaki wenno

babbai. [Dagitoy nga ordinansa ti mangipatungpal] iti kari ti Apo a dagiti tattaona—babbai ken lallaki—ket maikkan iti bileg manipud iti ngato’ [DkK 38:32].”⁴

Dagiti Mainayan a Nasantuan a Kasuratan ken Impormasion

Doktrina ken Katulagan 84:19–40; 121:45–46; reliefsociety.lds.org

DAGITI NAGADAWAN

1. M. Russell Ballard, “Men and Women and Priesthood Power,” *Liahona*, Sept. 2014, 36.
2. Sheri L. Dew, in *Daughters in My Kingdom: The History and Work of Relief Society* (2011), 128.
3. Linda K. Burton, “Priesthood Power—Available to All,” *Ensign*, 2014, 39–40.
4. Gospel Topics, “Joseph Smith’s Teachings about Priesthood, Temple, and Women,” topics.lds.org.

Ibilang Daytoy

Ania ti maaramidyo tapno ad-adda a naan-anay a maawatan ken maalayo dagiti naikari a bendision ti sapata ken katulagan ti priesthood?